

Kōttōpar ko an katak in:

- Kwaļok bwe ewor juon wōt iaļ ñan Anij.
- Kwaļok bwe jerowiwī an armej ej kōjepel er jān Anij.
- Kwaļok bwe Anij e kōṇaan pād ipped im tūriaṃo kake kōj.
- Kwaļok bwe unin an Anij maroñ tūriaṃokake kōj ej kōn bōtōktōkin Jisōs.

Meļeļe ko reļap ilo katak in:

- Jen lo bwe Anij ej yokwe kōj meñe je nana.
- Jen lo bwe je maroñ kepaak Anij ilo wāween An ba wōt.
- Jen lo bwe kien ej liaakļok kōj, ak Anij e kōṇaan tūriaṃokake kōj.
- Jen lo bwe bōtōktōkin Jisōs ej unin an Anij maroñ tūriaṃokake kōj.

Ke eṃōj an Anij liļok kien ko joñoul ñan ri Ju ro, Ear barāinwōt jiroñ er kōn juon jikin kabuñ. Etan jikin kabuñ in ej Mōn Kōppād eo. Meñe ri Ju ro raar bane kien ko An – meñe raar bane kwōjarjar - Anij ear kōṇaan jokwe ippāer im kōṃṃao ippāer. Ewi wāween bwe en āindein? Anij e kwōjarjar im wānōk. Ej dike jerowiwī. Ekōjkan An naaj maroñ in jokwe ippān ro me eṃōj aer rupe kien ko An? Ad katak kōn Mōn Kōppād eo enaaj uwaaki kajjitōk kein.


1. Anij ear jiroñ Moses bwe en kalōk Mōn Kōppād eo.

Ta in tūriaṃo? Tūriaṃo ej ñe ewor ruōn juon armej im ren kajeik e, ak ilo jouj re jab kajeik e. Wōn ej aikuļ tūriaṃo? Ro ri Israel raar aikuļi, bwe raar bane kien ko an Anij, im kōj, jej aikuļi.

* **Anij ej kōnono ippān armej.**

Anij ej kapukot armej bwe En kōṃṃao ippāer. Jān jinoan an Anij kar kōṃṃan laļ in Ear kōṇaan kōṃṃao ippān armej. Ilo jikin kallib in Iden Anij ear kepaakļok Adam im Iv bwe En kōṃṃao ippāer. Ro im rej erom nejin Anij renaaj pād Ippān ñan indeeo.

Anij ear je kien ko joñoul ioon ruo dekā bwe ro ri Israel ren kememeji. Ke Moses ear pād raan toļ eo, Anij ear barāinwōt liļok elōñ bar jet kien ñan ro ri Israel. Anij ear kōṇaan bwe ren kememej bwe Ear kōṃṃan er im kālōt er. E aer Kiiñ, im rej aikuļ pokake E.



Anij ear jeļā bwe ri Ju ro renaaj kar bane kien ko joñoul. E jeļā bwe ejjeļok juon armej ilo laļ e maroñ kōjparok kien ko An. Eñin unin An kapoje bar juon iaļ.



Aiseia 53:6 Kōj otemjej āinwōt sip ko jaar jebwābwe; jar jeorļok jabdewōt iad ñan iaļ ko an; im Jeova ear likūt ioon jerowiwī ko ad otemjej.

* **Anij e jouj im eṃṃan.**

Kōn an Anij jouj, im kōn An yokwe Israel (meñe raar nana), Ear jab man er bwe ren jako. Ej aikuj wor kaje kōn nana ko aer, ak Anij ear pukot kilen bwe en tōprak kaje eo, ak ren jab jako. Anij ear kōnaan bwe ren kōmman juon jikin bwe En jokwe ipaer. Ijo, re maroñ katak kilen kepaak Anij e kwōjarjar ilo juon wāween e jimwe bwe En jab man er.



Exodus 25:1,2,8 Im Jeova ear kōnono ñan Moses im ba, [2] “Kwōn kōnono ñan ro nejin Israel bwe ren bōktok joortak ñan Eō. Jān jabdewōt armej, ñe būruon e kōnaan, komwin bōktok joortak eo Aō. [8] Im ren kōmanman ñan Eō juon em e kwōjarjar, bwe In jokwe ipaer.

Men in e jab melelein bwe Anij e jab pād ijoko otemjej. Ke Ear itok bwe En jokwe ilo mweo raar kōmmane, Ear pād aolep jikin wōt. Ak raar kōmman mwiin bwe ren katak wāween kepaak Anij.

2. Raar aikuj kōmman Mōn Kōppād eo ilo wāween an Anij ba.


* **Armej re maroñ kepaak Anij ilo wāween an Anij ba wōt.**



Exodus 25:9 Ekkar ñan men otemjej Ij kwaḷok ñan eok, joñak in mōn kōppād eo, im joñak in men ko otemjej ilowaan, āindein komwin kōmanmani.

Naan eo ilo kajin Hibrū kōn “mōn kōppād” ej juon naan me e melelein “em nuknuk” ak juon jikin an armej jokwe.

Aolep men ilo mwiin rej aikuj ilo wāween an Anij ba.



- Raar aikuj kōmmane ilo wāween an Anij ba.
- Kememej bwe Kein ear jab kepaak Anij ilo wāween an Anij ba, im Anij ear jab bōk e.
- Noa ear kōmman wa eo ilo wāween an Anij ba. Kōn an tōmak Anij, Anij ear bōk e.
- E jab ad pepe kōn wāween ad kepaak Anij.
- Anij ej katakin kōj ilo Bible wāween kepaak E.

Wōn ear kōmanman laḷ in? Wōn ear kōmanman kōj? Wōn ear kajutak eklejia eo an Kraist? Anij! Kōn men in, wōn kōj bwe jen pepeik Anij? Wōn kōj bwe jen jab tōmak E? Ear letok naan ko An bwe jen jeḷā iaḷ eo ñan lañ im bwe jen jeḷā kilen bōk anjo ioon jerōwiwi. Eḷañne je kōnaan mour indeeo, jenaaj aikuj loore iaḷ eo wōt me Anij ej kwaḷok e.

Ro ri Israel raar etetal ḷok ñan āne in kallimur eo. Kōn men in, mweo ear aikuj juon em e mera im me re maroñ jeḷate im bar kajutak e jān iien ñan iien.

3. Jikin Kwōjarjar otem kwōjarjar.


* **Anij e kwōjarjar im wānōk. Ej ba bwe ro rej jerōwiwi rej aikuj in mej.**



Exodus 26:33 Kwōn katotouk katiin eo kōn kāāj ko im likūt tōptōp in kallimur ilowaan. Im katiin in enaaj kōjepel ikōtan jikin kwōjarjar eo im jikin kwōjarjar otem kwōjarjar.

Anij ear jiroñ ri Ju ro bwe ren kōmman ruo ruum ilo Mōn Kōppād. Etan ruum eo mokta ear **jikin kwōjarjar eo**.

- Anij e kwōjarjar im wānōk im E jepel jān ro ri jerōwiwi.
- Ruum in ej ñan jermal ñan Anij, im men in wōt.
- Pris ro wōt, me Anij ear kālōti, raar maroñ deļoñ im jermal ie.



Ruum eo kein karuo ear **jikin kwōjarjar otem kwōjarjar**.

- Ekar mo an jabdewōt armej deļoñ ilowaan jikin kwōjarjar otem kwōjarjar ijellokun wōt Pris eo Eļap.
- Pris eo eļap ear jab maroñ deļoñ aolep iien. Ear mālim an deļoñ juon wōt iien kajjojo year.



Livitikōs 16:2, 34 Im Jeova ear ba ñan Moses, “Kwōn ba ñan Aron, jeōm, bwe en jab itok iien ko otemjej ilowaan jikin kwōjarjar, ilowaan katiin eo imaan jikin tūriamo eo ej pād ioon tōptōp eo, bwe en jab mej. [34] ... juon alen ilo juon iio.”


- Ruum in ear jikin eo im aiboojoj an Jeova ear pād ie ippān Israel.

Etke Jeova ear kamō an armej deļoñ ilo jikin kwōjarjar otem kwōjarjar? Ij ba wōt Anij ear kōnaan jokwe ippān ri Ju ro im kōmmao ippāer. Anij e kwōjarjar otem kwōjarjar. Armej re kwōjarjar ke? Re jab. Eñin un eo bwe elōñ juon katiin me ej kōjepel jikin kwōjarjar otem kwōjarjar jān armej ro. Eñin un eo bwe e mo aer deļoñ. Kōj ri jerōwiwi. Je bane wānōk an Anij. Je jepel jān Anij. Anij ear kōnaan kakeememej ri Ju ro bwe raar rupe jemjera eo ippān Anij kōn aer jerōwiwi. Aer jerōwiwi ear kattoļok er jān Anij. Ejab ruōn Anij bwe armej re jab maroñ kepaak E im kōmmao Ippān. Ej ruōn wōt armej.

4. Tōptōp in Kallimur im jikin tūriamo.



Exodus 25:10, 11 Im ren kōmman juon tōptōp jān wōjke akesia: aetokōn 45 inch, im depakpakin 27 inch, im utiejen 27 inch. Im kwōn ña kilin kōn gold erreo, ilowaan im ilikin kwōn ña kilin, im kwōn kōmanman juon tōrerein gold i peļaaakin.



Anij ear jiroñ ri Ju ro bwe ren jeke juon book im kadeļoñ e ilo ruum eo etan Jikin kwōjarjar otem kwōjarjar. Anij ear barāinwōt jiroñ er bwe ren likūt dekā ko ruo me emōj jeje kien ko joñoul ie ña ilowaan book in ña etan tōptōp in Kallimur.



Exodus 25:16 Im kwōn likūt ilowaan tōptōp eo, naan in kallimur eo Inaaj lewōj.

Ta in “naan in kallimur” eo? Naan in kallimur ej kien ko joñoul. Anij e kwōjarjar, im E kar jiroñ ro ri Israel bwe Enaaj bōk er eļañne rej kōjparok aolep kien ko An aolep iien. Ak eļañne re jab, innām

Enaaj jołok er. Eñin bujen eo ikōtaan Anij im armej ro. Kien kein ren pād ilo tōptōp eo aolep iien ñan kakememej armej ro kōn men ko Anij ej ba me armej rej aikuj kōmmani.

Anij ear ba bwe Moses en kōmman juon mejān tōptōp eo jān kool erre. En juon jikin jijet, im en wor ruo kerub ioon men eo.



Exodus 25:17, 18 Im kwōn kōmanman jikin tūriamokake jān gold erre: aetokōn 45 inch, im depakpakin 27 inch. Im kwōn kōmmani ruo kerub jān gold; kwōn kōmmani jān gold me emōj noe, im kwōn likūti ilo jabōn ko ruo ilo jikin tūriamo eo.

Jikin tūriamo in ear men eo e aorōktata ilo mōn kōppād eo. Ijo Anij ear ba bwe Enaaj tūriamokake Israel meñe raar ri jerowiw. Tūriamo ej ñe Anij ej kōtlōk ro ri nana jān kaje eo me ren kar bōke.

TŪRIAMO
Ñe Anij ej kōtlōk ro ri
nana jān kaje eo me
ren kar bōke.

Ioon mejān raar likūt ruo annañin enjel ro (kerub ro). Enjel rein raar jelmae doon im peir peen bao raar itaak ippān doon. Jeova ear ba bwe aiboojoj eo An enaaj itok im pād ioon enjel rein.



Exodus 25:22 Im ijo Inaaj iioon eok, im Inaaj kōmmao ippam ilōñin jikin tūriamo, ikōtan kerub ko ruo me rej pād ioon tōptōp in naan in kallimur, kōn men ko otemjej inaaj lewōj ñan kwe, naan in kaiñi kōn ro nejin Israel.

Łōmṅak kake! Aolep iien ke Jeova ear iioon ri Ju ro, Ear reilallōk ñan ilowaan tōptōp eo im lo ta? Ear lo kien ko joñoul. Ear lo kallimur eo An ikōtaan im ri Ju ro. Ri Ju ro raar kallimur ñan Anij im ba ta? Raar ba, “Aolep kien kein joñoul kōm naaj kōmmani.” Ta mool ke je maroñ kōjparok kallimur rot in? Je ban. Emōj ad rupe kadede aolep kien ko an Anij. Eļañne Anij ej lo bwe emōj ad rupe kien ko An, enaaj ewi wāween ad kōmmao Ippān? Enaaj ewi wāween ad ko jān naaj ekajet eo An?

5. Pris eo eļap en wōtdikdike jikin tūriamo eo kōn bōtōktōk.



Livitikōs 16:14 Im en bōk jān bōtōktōkin kau koṃaan eo, im en kabūtūktūk kōn juon addiin pein ioon jikin tūriamo i reear; im imaan jikin tūriamo en kabūtūktūk jān bōtōktōk eo kōn addiin pein jiljilimjuōn alen.

Bwe en emman ad meļeļe kōn tokjān men in, je naaj aikuj āliji jidik. Ruuṃ eo im tōptōp eo ej pād ie ej jikin kwōjarjar otem kwōjarjar. E mo an armej deļoñ ie. Kien ko joñoul rej pād ilowaan tōptōp in, im emōj an aolep armej koṅkure. Bōtab kiiō ewor juon jikin tūriamo, im jikin tūriamo in ej pād ia? Ej pād ilōñin tōptōp eo im kien ko. Jikin tūriamo, ilo waan joñak, ej pinej mejān Anij jān ad rupe kien ko An. Eñin un eo bwe mejān boṅk in ej bōk āt in tūriamo.

Ak kattar wōt! Etke Anij e maroñ tūriamo kake kōj? Anij e kwōjarjar, bōtab je jab kwōjarjar. Emōj ad koṅkure kien ko An. Uwaak eo ej bōtōktōk. Pris eo eļap ear wōtdikdike jikin tūriamo eo kōn bōtōktōk. Etke Anij e maroñ tūriamo kake kōj ilo raan kein? Ej tūriamo kake kōj kōn juon wōt men: bōtōktōken Jisōs Kraist.



Hibru 9:11, 12 A ke Kraist ear itok āinwōt Pris elap ñan men ko remman renaaj itok, kōn imōn kōppād elaplok im weppānlok, jab kōmmane kōn pein armej, āinwōt ba, jab jān men in kōmanman in, im jab kōn bōtōktōkin got ko im koon kau ko, a kōn bōtōktōkin make emōj An deļoņ juon wōt katen ilowaan jikin kwōjarjar eo, im jibadek lōmoor indeeo.

Kajjitōk ko

1. Ta eo ej dāpij Anij jān An jokwe ipped im kōmmao ipped?
2. Anij ear jiroņ ri Ju ro bwe ren kalōk ta ñan E?
3. Etke Anij ear kōnaan bwe Israel en kōmman juon em e kwōjarjar ñan E?
4. Wōn ear kwaļok joņan im wāween kōmmane mōn kōppād eo?
5. Armej re maroņ ke ikūre ak kakōmanman lok joņan ak wāween mōn kōppād eo?
6. Elōņ kar jete wāween kōmanman mōn kōppād eo?
7. Elōņ jete iaļ ñan Anij?
8. Etan ruum ko ruo ilo mōn kōppād eo?
9. Wōn eo e maroņ in deļoņ ilowaan jikin kwōjarjar otem kwōjarjar?
10. Im ear maroņ in deļoņ ñāāt?
11. Etke ear wor juon katiin im juon kien bwe armej raar jab maroņ in deļoņ ilo jikin kwōjarjar otem kwōjarjar?
12. Etan book eo im raar kadeļoņ e ilowaan jikin kwōjarjar otem kwōjarjar?
13. Ta kobban book eo?
14. Etke kein ko joņoul raar pād ilowaan book eo ilo jikin kwōjarjar otem kwōjarjar?
15. Ewi etan mejān book eo (tōptōp in kallimur)?
16. Pris eo ear wōtdikdike Jikin Tūriamo eo kōn ta?
17. Ta eo ej kōmman bwe Anij en jab lo nana ko ad im En tūriamo kake kōj?